

27. august 2026

UKA 2026/260

Naqqiut

Siunnersuut 14. august 2026-meersoq taarserpaa

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Utoqqaat inatsisitigut illersorneqarnerat, isumagineqarnerat ataqqinassusaasalu qanoq nukittorsarneqarsinnaanersut pillugit nassuiaateqartoqarnissaannut Naalakkersuisut peqquneqarnissaannik Inatsisartut aalajangiiffigisassaattut siunnersuut. Nassuiaammi aamma ilanngunneqassapput tigussaasunik siunnersuutit aningaasatigut allaffissornikkulu kingunissaasa nalilersorneqarnerat. Nassuiaat Inatsisartunut agguanneqassaaq UPA 2027 nallertinnagu.
(Inatsisartunut ilaasortaq Margrethe Thårup Andersen, Demokraatit)

Tunngavilersuut

Utoqqartagut inuunerminni sivisuumi inuiaqatigiinnut ilusilersueqataasimapput.

Sulisimapput, meeqqanik perorsaasimapput, ilaqutariinnik ilusilersuisimapput, najugaqarfitsik unittoortinnaveersaarsimavaat aammalu ullumikkut nunagisatsinni suleqataasimallutik. Utoqqaat nanertuutaanngillat. Inuupput, toqqissisimasariaqartut ataqqisariallilu.

Demokraatit isumaqarput, ileqqorissaarnermut politikikkullu pisussaaffeqartugut, innuttaasut utoqqaat ikiorneqarnissamik, paaqqutarineqarnissamik tapersersorneqarnissamillu pisinnaatitaaffiisa qulakkiisallugit.

Utoqqaat oqaaseqartartuata 2025-imut nalunaarusiaata takutippaa, utoqqarnut tunngatillugu sulii unamminartorpassuaqartoq. Nalunaarusiami ilaatigut paaqqutarineqarnerup isumassorneqarnerullu naammannginnerisa ajornartorsiutaanerat tikkuartorneqarput, inatsisitigut illersorneqannginnerat, pisortanit sullinneqarnerup naammannginnera, puigortunngornerup iluamik paasisitsiniutaannginnera, ineqarniarnikkut ajornartorsiutit aammalu illoqarfiit nunaqarfiillu akornanni sullinneqarnerup assigiinnginnerujussua. Utoqqaat oqaaseqartartuannut saaffiginnissutit amerlassusaat 2024-imi 118-iniit 2025-imut 148-inut qaffassimapput, nalunaarusiamilu nalilerneqarpoq, ajornartorsiutit ataasiakkaaginnaanngitsut, ilusilersugaanermiilli ajornartorsiutineersuusut¹.

¹ Utoqqaat pillugit oqaaseqartartoq 2025-mi UKIMOORTUMIK NALUNAARUT



DEMOKRAATIT

Ilumoorinnaangilaq, utoqqaat qanigisaallu aqqissuussaannermut akersuuttuaannavinnissaat, ikiorneqarnissaminut pisariaqartitaminnut ikiorneqarumallutik. Utoqqaq angerlarsimaffimmi ikiorteqarnissamik, isumassorneqarnissamik, puigortunngorluni tapersorneqarnissamik, ikiuutaasinnaasunik pisariaqartitsippat, tulluuttumik ineqarnissaminik imaluunniit ersarissumik oqartussaniit aalajangiivigineqarnissaminik pisariaqartitsippat, ersarissumik, akisussaassusilimik paasinartumillu akissuteqartoqassaaq. Minnerunngitsumik utoqqaat atugarliornerpaat pineqartillugit, namminneerlutik naammagittaalliornissaminut nukissaqanngitsut, paasiniaanissaminut imaluunniit pisinnaatitaaffimminnik malitsitsisoqarnissaannik piumasaqaateqarnissamut nukissaqartuaannanngitsunut.

Nalunaarusiap aamma tikkuartorpaa utoqqaat illuisa nakkutigineqanngilluinnarlutilluunniit naammanngitsumik nakkutigineqarneri. Tamanna ilungersunarpoq. Nakkutillineq piumasaqaataannaangilaq. Sakkuuvoq qulakkeerumallugu, innuttaasut utoqqaat illersorneqarsinnaasumik najugaqarlutillu inuuneqartinneqarnerannut. Nakkutillineq ingerlanneqarsimanngippat imaluunniit naammanngitsumik ingerlanneqarsimappat, sumiginnaanerup ingerlaannarnissaa angoriaannaavarput².

Taamaattumik Demokraatit isumaqarput, ataatsimut nassuiaasiornissaq pisariaqartoq, Inatsisartut politikkikkut ersarissumik tunngavilernissaannut utoqqaat atugaannik pitsanngorsaannissamut. Nassuiaat ilaatigut ersarissaanermik imaqartariaqarpoq, qanoq utoqqaat inatsisitigut illersorneqarnerat nukittorsarneqarsinnaanersoq, qanoq kommunit utoqqaat illuinit nakkutillinerat ingerlanersoq, qanoq angerlarsimaffinni ikiorteqarneq ullutsinnut tulluussarneqarsinnaanersoq, qanoq puigortunngortunut akisussaaffik ersarissarneqarsinnaanersoq, aammalu qanoq utoqqaat nunaqarfinni assigiimmik ikiorneqarlutillu tapersorneqarnerisa qulakkeerneqarsinnaanerat.

Tassungalu ilutigalugu pingaartuuvoq, nassuiaammi ajornartorsiutaannaat eqqartorneqanngimmata. Aammali nalilersorneqassapput pitsanngorsaatissaatut siunnersuutit tigussaasut aammali qulaajarneqassallutik, taakku Namminersorlutik Oqartussanut, kommuninut aammalu sullissisunut allanut aningaasatigut allaffissornikkullu sunik kinguneqassanersut.

Tamanna pisariaqarpoq, utoqqarnut tunngasut kusanartunik siunertalersuinnarluni pitsanngorsarneqarsinnaanngimmata. Inatsisartut akisussaassuseqartumik isummissappata, ilisimasariaqarparput, suliniutit suut pisariaqarnerpaanersut, suut sukkanerpaamik piviusunngortinneqarsinnaanersut, suut inatsisinik allannguineramik pisariaqartitsinersut, aammalu suut siunnersuutit ataasiakkaat aningaasatigut allaffissornikkullu kinguneqartussaannersut.

Tamanna tunngaviatigut ileqqorissaanermik tunngassuteqarpoq. Inuiaqatigiit ilisimaneqaatigisussaavaat, qanoq utoqqartatsinnut iliuuseqartarnersugut. Inuit taama annertutigisunik nunatsinnut tunniussisimagunik, naatsorsuutigisariaqarpaat, namminneerlutik ikiorneqarnissaminnik

² Utoqqaat pillugit oqaaseqartartoq 2025-mi UKIMOORTUMIK NALUNAARUT



pisariaqartitsilerunik, suna tamarmi piareersimassasoq.

Tamanna tunngavigalugu neriuppunga, Naalakkersuisut Inatsisartuniilu partiit tamarmik siunnersuut taperseerumaaraat.

Pisortanut aningaasatigut allaffissornikkullu kingunissai

Nassuiaatip suliarineranut atasumik aningaasartuuteqassaaq. Taakkuli ilinniagartuup ukiumut akissarsiai 500.000 koruunit qaangissanngikkai ilimagineqarpoq.

Namminersorlutik inuussutissarsiortunut aningaasatigut allaffissornikkullu kingunissai

Nassuiaatip suliarineqarnerani ilimagineqanngilaq.

Innuttaasunut aningaasatigut allaffissornikkullu kingunissai

Nassuiaatip suliarineqarnerani ilimagineqanngilaq.